

Cambridge International Examinations

Cambridge Ordinary Level

SETSWANA 3158/02

Paper 2 Literature October/November 2015

1 hour 30 minutes

Additional Materials: Answer Booklet/Paper

READ THESE INSTRUCTIONS FIRST

If you have been given an Answer Booklet, follow the instructions on the front cover of the Booklet.

Write your Centre number, candidate number and name on all the work you hand in.

Write in dark blue or black pen.

Do not use staples, paper clips, glue or correction fluid.

You should refer to the instructions printed overleaf with the questions.

At the end of the examination, fasten all your work securely together.

The number of marks is given in brackets [] at the end of each question or part question.

BUISA DITAELO TSE PELE

Fa e le gore o filwe bukana e go arabelwang mo go yone, tsweetswee, ela tlhoko ditaelo tse di kwa tshimologong ya bukana.

Kwala nomoro ya lefelo le o kwalelang mo go lone, nomoro ya gago le leina la gago mo pampiring nngwe le nngwe e o kwalelang mo go yone.

Kwala ka pene e e botala jwa loapi jo bo tseneletseng kgotsa ka pene e ntsho.

Se dirise sepe sa ditshitswana tse di tshwarang dipampiri, kgotsa metako epe, kgotsa dilo tse di manegang le tsone dilo tse di dirisiwang go sutlha kgotsa go baakanya.

Tsweetswee, ela tlhoko ditaelo tse di tsamaelanang le dipotso.

Kwa bofelong jwa tlhatlhobo, bofelela mmogo sengwe le sengwe se o se kwadileng.

Palo ya maduo e supiwa mo masakananeng [] kwa bokhutlong jwa potso nngwe le nngwe kgotsa bontlha jwa potso.



☑ CAMBRIDGE

International Examinations

Section A

KAROLO A: KHUTSWE/PADI

Ela tlhoko: Kwala boleele jwa tsebe le seripa mo potsong nngwe le nngwe.

Araba Potso 1(a) kgotsa Potso 1(b).

1 (a) Mareledi a sa le pele – M. O. Mothei

Bala temana e e fa tlase, o bo o araba dipotso tse di e latelang.

'Ntšanyana ya maitaya sebatana e bonwa mabotobotong, fela jaaka mmamotse a bonwa mantlwaneng. Naledi a bo a le bobedi jo. A le matlomonyana go tswa bonnyeng. Fa a buduloga gone go sa buiwe. Ene o sale a itshupa se a tla nnang sone go simolola fela fa a tshameka mantlwane. A gagwe o fitlhela a le phepa, a dirilwe ka matlomonyana. E tla re a sena go fapha jaana a bo a simolola go tsenya sekolo, ene a le morutabana. Selo sengwe se neng se gape maikutlo e ne e le nako e go ne go twe ke ya phepafatso ya motse. A nna bogale thata fa tiro e sa dirwe ka tshwanelo kgotsa mongwe a tla morago ga nako.

Bagolo o ba tshabe. Ba bo ba sale ba mmone bogologolo. Jaaka e le tlwaelo ya Setswana, ba e ngunanguna ka kwa dipelong. Bangwe ba lela sa o tla-gomotswa-e-mang, go bo ba se na bana ba basimane. Yo ruri mmatsalaagwe o ka kgona go roba maoto.

(Tsebe 12)

(i)	Polelo e: 'Jaaka mmamotse a bonwa mantlwaneng' e kaya eng?	[2]

- (ii) Naledi, jaaka moanelwa mo temaneng e, o kaiwa e le motho yo o ntseng jang? [6]
- (iii) Goreng Naledi a ne a gapa bagolo maikutlo fa a ne a sa ntse a gola? [4]
- (iv) Go tewa eng fa go twe 'Yo ruri mmatsalaagwe o ka kgona go roba maoto'? [4]
- (v) A mme kwa bokhutlong, Naledi o ne a feletsa e le motho yo bomme ba eletsang e ka nna ngwetsi ya bona? Anaanela ka botlalo. [9]

[25]

Kgotsa

(b) *Mosekela mpeng* – T. Mbuya

Bala temana e e fa tlase, o bo o araba dipotso tse di e latelang.

"Hei! go ne go a tle go nne monate kwa ga mmaLorato. Fa gongwe o bo o fitlhele bananyana ba eme ka fa ntle ga legora ba lebeletse borraabo ba thamile. Go jewa koma. E re fa a re o a e tlhabeletsa fa Tumelo, o utlwe o ja monate."

Go ya ka nopolo e e fa godimo, setšhaba sa Bakwena se ne se le kwa ga mothakga se thakgaletse. Go senyegile fa go fitlha fa kae? Tlhalosa ka botlalo.

[25]

Section B

KAROLO B: MOTSHAMEKO/TERAMA

Araba Potso 2(a) kgotsa Potso 2(b).

2 (a) Motho ntsi – L. M. Mphale

Ketlaitheng: Go siame MmaDitsholo. Mo reye a boele mo lwapeng. Ke mo itshwaretse, le fa ngwana yo a ntshegisitse batho jaana. Ke a itse gore batho ba ba tshwanang le Ditshego ba setse ba itse fa Matshediso a alotswe mo sekoleng. Waitse mosetsana yole ke serongwane. Ga go nne sepe se a sa se itseng mo Malaakhakhe. Dilo di dirafala masigo batho ba robetse mme ene o phakela a di bolelela batho mo motseng. Mmatsale o ka boela kwa lwapeng, re tla bonana ka moso.

- (i) Goreng Ketlaitheng a re Matshediso o mo tshegisa ka batho? [5]
- (ii) Ngwana yo, o dirile eng se se kalo gore mmaagwe a mo kobe kwa gae? [4]
- (iii) Go lebega Ditshego e le motho yo o ntseng jang? [4]
- (iv) Ketlaitheng o lebega e le mme yo o nang le molao. O ikaegile ka ditiragalo tsa terama e, a mme se ke nnete? [12]

[25]

Kgotsa

(b) Ngwanaka, o tla nkgopola – M. Lempadi

Akofang: Kgaitsadiaka! nona pelo! Fa e le gore mosadi yo o bolaile ngwana wa rona ka maikaelelo a go ja dithoto tsa gagwe jaaka go setse go itshupile, a re neeleng ntša lerapo e kokone, le tla tsewa ke e nngwe e sa solofela! A re fitlheng ngwana wa rona fela kwa ntle ga dikgang tse dintsi, re robaletseng mowa wa yo o re tlogetseng ditlhokwa.

Mafoko a ga Akofang ga a aka a wela fa fatshe. A ke nnete? Tlotla ka botlalo se se diragaletseng setlogolo sa ga Akofang!

[25]

Section C

KAROLO C: POKO

Araba Potso 3(a) kgotsa Potso 3(b) le Potso 4.

3 (a) Mahura a poko – L. Magopane

Bala leboko le le tlhagelelang fa tlase, morago o neele diteng tsa lona ka mafoko a gago.

Ela tlhoko: Fa o araba potso e, o se ke wa nopola mela ya leboko jaaka e ntse, o tlile go latlhegelwa ke maduo.

Kgorogo ya Losea

Gaetsho go tsetswe seponkaponka, Go tsetswe mogale gare ga bagale Bonokwane bo tlaa tsena ka lenga la seloko, Beng jwa bone ba tlaa gasama.

Matlho a gagwe a galalela segouta Sefatlhego se tedima botsipa Jwa tshenko ya bopelokgale Goroga ka pula ngwana' etsho.

Ga se mothonyana ke Rara Wa mophato wa ntswe tsa Manyalala Ke seipone sa lapa la ga mme! Rebona dilabe ka sone re di tlhaola.

A kgomo e hulwe re ipele Re bo re lalele ka kgatsele Ka re itse e na le dikotla tsa menontshane Thele e tle e thobethobe lerwana.

Ke wena mogale wa ka moso Banna ba tsoga ba go rolela dihutshe Ba go robela maoto go go botšhela Ka o tla ba sireletsa lešekereng le baba.

Bagaetsho, lefatshe le bonye mosireletsi Dinokwane di a belaela di a ngwangwaela Ga di iphetlhe di setlhefala ka monokela Ka tota di utlwaletse mokgwasa wa mmoloki.

[15]

Kgotsa

3 (b) Masalela a puo – M. Kitchin

Mmoki o kgonne go dirisa ditsela dife le go fitlhelela kae go senola dintlha tse di botlhokwa ka ga botho, tse re neng re di tlhaetsa matlho?

Botho jwa motho mo bathong

Botho jwa motho mo bathong konokono! Ga botle ka go pelekanya dithuto, Kgotsa go kakatlela segologolo; Bo motswedi mongwe-fela, maikutlo.

Kwa bo fitlhelwang teng bo bonwa fela, Ga bo ko bo tlalatlala, bo a welwa; Baikgantshi ba kgantsha lefela, Ka jwa bona botho ga bo a felela.

Botho jwa motho bo a ikgobalatsa, Ga bo ko bo ipheteletsa pele; Jo e leng jona bo a ikokobetsa Bo gopoletse batho ba bangwe pele.

Fa bo seyo thuto-kgolo ga se sepe; Bo leyo bo tlotlomatsa e potlana; Bagodi le bana ga bo tlhophe ope, Mo go jone batho ba a lekalekana.

Botho jwa motho ga bo akabalelwe, Boitshwaro jwa jone bo totobetse; Botho ke jone fela boswa-bo-tshwerwe, Ke jone phokokgolo go itsitswe.

Bomorwa mangmang ba itsiwe ka jone, Baronaki ba kakatletse lephore, Ba tlamparetse lefela le bone, Ka ba kadisa tsone fela diphare.

Bontsi bo bo putletse ka dikhumo, Ba bangwe ba bo putlela ka diteme, Bangwe gape ba bo batla ka medumo; Ba tlhoka go bona le e leng lemme.

Ga bo pekwe ka sepe go okediwa, Gonne jo e leng jone ga bo phakwe; Jone tota ga bo ko bo ipolelwa, Bo fela mo pepeneneng ga bo gake.

Ntsha matlho o bo tseye malebela, Dikai di tletsetletse ga di tlhokwe; Ga bo kgotla e e leng ya jone fela, Le o tsaya jwa ga mangmang ga go sekwe.

Phetla ditsebe tsa dikwalo bo gone, Tlhwaela dipuo tsebe o bo bone; Itsalanye le motho mongwe le mongwe, Le e leng monyadiwa bo mo go ene. Le

4 Bala leboko le le tlhagelelang fa tlase ka kelotlhoko. Fa o feditse go le bala, neela diponagalo tsotlhe tse di tlhagelelang mo lebokong le.

Ela tlhoko: Fa o araba potso e, o nopole fela mela ya leboko e e tlhalosang mofuta wa ponagalo eo ka fa tlase ga yone, o bo o thalele fa go leng ponagalo eo fela. Sekao: Tlogelo: **kgomo** tsaabo boemong jwa **dikgomo** tsaabo jj.

Mokirietso wa ga Keloapere

Kgaotsa ngwanaka o ikhutse, Mmago o itapetse lwa pitse, Ka ga a ke a bonwa a dutse, Ga a ke a bonwa a ikhutsitse.

Go thaega letsatsi le tlhaba Mmago ga bone boikhutso, Mme ga ke a bonwa a kgaba, O tlhagola a na mefufutso.

O godile o anya mogote, O akanya ditlhabi tsa sehuba, Ke tsentswe bokoa ke bokote, Mogote wa letsatsi o ntshuba.

Rrago o phomotse, o nasitse, O lebile nkgwana ya bojalwa, Mme mmago, maoto a patsitse,. Le dikgong ga di na go rwalelwa.

Kgaotsa, o anye masetlana, Le wena o tlaa nna moruiwa, O nne botshelo jwa lebotlana, O tshele botshelo jwa go sotlwa.

Kgaotsa ngwanaka, o robale, O tlogele mmago a fomole, Ditlhabi di ise di gakale, Di kgotlwa ke khoo le borole.

[10]

7

BLANK PAGE

8

BLANK PAGE

Permission to reproduce items where third-party owned material protected by copyright is included has been sought and cleared where possible. Every reasonable effort has been made by the publisher (UCLES) to trace copyright holders, but if any items requiring clearance have unwittingly been included, the publisher will be pleased to make amends at the earliest possible opportunity.

To avoid the issue of disclosure of answer-related information to candidates, all copyright acknowledgements are reproduced online in the Cambridge International Examinations Copyright Acknowledgements Booklet. This is produced for each series of examinations and is freely available to download at www.cie.org.uk after the live examination series.

Cambridge International Examinations is part of the Cambridge Assessment Group. Cambridge Assessment is the brand name of University of Cambridge Local Examinations Syndicate (UCLES), which is itself a department of the University of Cambridge.